



UKA 2015/161
8. oktober 2015
Ane Hansen

Uunga siunnersuut: Inissiani attartortittakkani ineqarnermut tapiissutit pillugit Inatsisartut inatsisaat nr. xx,xx xx 2015-imeersoq.

(Ilaqutariinnermut, Naligiissitaanermut Isumaginninnermullu Naalakkersuisoq)

Ineqarnermut tapiissutit pillugit Inatsisartut inatsisaata iluarsissutissaanut siunnersuut naatsersuutigisimagaluarparput aqqissusseqqinnerit maanna ingerlanneqartut utoqqalinersiat siusinantumillu sulisinnaajunnaarnersiat eqqarsaatigalugit aqqissuussinerussasoq taamaliortoqanngilarli.

Uani inatsimmi aqqiissutissat marluinnaapput, siulleg tassaalluni ineqarnermi tapiissutit naatsersorneqartarnerani isertitat nutaajunerusut aallaavigineqartalernissaat. Aappaatullu inissiat namminersortunik pigineqartut attartortittakkat iluanaarniutaanngitsumik tapiissuteqartalernissamut nalunaarusiaq aqqutigalugu aqqiissuteqarsinnaalernissamik periarfissaqarumaneq.

Allannguutissatut siunnersuutit Inuit Ataqatigiinnit tapersersornartissinnaavagut, taamaattorli isertitat nutaanerusut aallaavigineqartalernissaani utoqqalinersiutit, siusinantumillu sulisinnaajunnaarnersiutit pillugit iluarsaaqqinnermi eqqorneqartussaasut soorlu utoqqaat aappariit qanoq eqqorneqartussaanerit erseqqissarneqassasoq kissaatigissuarput. Aamma siusinantumik sulisinnaajunnaarnersiutillit sulisinnaassusiat aallaavigalugu isertitaasa nikerarnerat sulisinnaajunnaarnersiutilimmut allaffissornermullu tunngatillugu kingunissaasa erseqqissuliutigineqarnissaat kissaatigissuarput. Siusinantumik sulisinnaajunnaarnersiutillit sulisinnaassusaasa procentingorlugu immikkoortiterlugit aqqissuussisoqalernerani naatsersuutigineqassamat ukiup ilarujussua suliffissaaleqisutut nalunaarsorneqarumaartut eqqumaffigineqartariaqarporlu inigisaminnik anisitaasut amerleriarujussuannginnissaat.

Inuit Ataqatigiinnit ilanngullugu ujartorusupparput suliffissaaleqisut sulilernerminni ingerlaannaq ineqarnermut tapinik allanillu tapinik piiaffigineqarnikkut artorsarneruleraangamik suliffissaaleqinermut inissinnissartik oqinnerulersutut isigisarmassuk naak sulerusukkaluarlutik, ajornartorsiut taanna ilisimaneqarlualereemat ilaatigullu ineqarnermut tapinut attuumassuteqarluni inatsisip uuma iluarsaqqinnissaanut ikaarsaarutaasinnaasumik iluarsiisoqarnissaa kissaatigaarput.

Aningaasap pisissutigineqarsinnaanera isertitakinnerusut eqqarsaatigalugit appariarsimavoq, taamaammatt Inatsisartuni ilaasortanut eqqarsaatissiisutigerusupparput ineqarnermut tapi kiassarnermut tapimik ilaneqartariaqannginnersoq, tassami ukiuni kingullerni ineqarnermut akiliut qaffariartorsimavoq orsussamut aki qaffattarnera ilutigalugu. Taamaammallu aningaasarsiakinnerusut pisissutigisinnaasaat apparsimalluni.

Inatsit una aqqissuusseqqinnerit pissakinnerusunik mio.-nerpassuarnik aallerfiorersunut ilaasutut oqaatigineqarsinnaavoq tassami inatsisip uuma atuutilersinnerani oqaatigineqarpoq 12,8 mio.-nik sipaarutigineqassasut.

Ataatsimut isigalugu oqartoqarsinnaavoq maanna Naalakkersuisoqatigiit annertumik innuttaasunik pissakinnerusunik aqqissuusseqqinnikkut siulliullugit mio.-nerpassuarnik nalilinnik aallertoqartoq, pissaqarnerit pisuullu eqqissisimatillugit. Tamanna soorunami

eqqarsarnaqaaq akuersaaruminaallunilu. Periuserli taanna Naalakkersuisoqatigiit qinersimavaat. Inuiaqatigiinni pissakinnerit ukiuni aggersuni sulii aningaasaqarniarnikkut artorsarnerulersillugit aqqissuussinissaq. Aqqissuusseqqinneq allatut ittoq Inuit Ataqtigiit takorloorsimavaat.

Taamatut oqaaseqarluta siunnersuut una aappassaaneerseqartinnani inatsisartut ilaqtariinnermut ataatsimiisitaliani misissugassat ilanngullugit suliarineqaaqqissasoq inassutigaarput.